



«Dulà al jerial lui, a lis cinc e mieze di vinars di setemane stade... ce al stevial fasint?»

«Ah... Ca mi fasi pensâ... Alore je colpe di un surisin!»

Il miedi lu cjalà di daûr dal ordenadôr, piçantsi il barbuç e poiant il comedon sul scritori tant che une cridade. «Un surisin? Ce tipo di surîs e jerie? Un surisin eletric?»

«Ma no, ma no! O jeri a fâmi la barbe, ma saial, no ai plui la man ferme di une volte, e alore gno fi mi à comprât il rasôr eletric, di chei modernis, che a fasin parfin la reclam par television, e un candalue di surisin nol devial vêmi gramolât il fil! Si che duncje i ai cjapât une piçule scossute. Robe di nuie, une tiradute... Ah maledet surisin!»

Il cardiac al menà il cjâf e al tacâ a smanetâ sui botons cuntune man intant che cun chê altre al scoltâve il baticûr di Lussian.

Un mês prin la colpe e jere stade di une moscje, che al veve cirût di parâ vie cuntune canevasse de *abasûr* moderne sul comodin che i veve regalade sô cugnade, ma che la canevasse e jere umide e la lampadine e jere crote e alore... op! *la tiradute*.

Trê mês prin la colpe e jere stade di une pudiese, che e jere lade a ficjâsi dentri nuiemancul che dal lampadari de cusine, parsore de taule, che no si sa mai che e ves di colâ dentri de brovade o - piês ancjemò - dal lidric, che e jere juste dal stes colôr, e alore al veve scugnût montâ su la cjadree e ficjâ i dêts e... op! *la tiradute*.

Insome, neancje sîs mês che i vevin metût il defribiladôr, par judâ il cûr a no fâ i mateçs, e Lussian al jere za trê voltis che al tornave dal miedi, plen di fastidis, a dî che no i funzionave ben.

«Lui no ma la conte juste!» i disè il miedi, intant che al sistemave frecuencis e voltagjo dal

imprest, mandât a nolis de solite *tiradute*. «Al à di stâ atent! Nol à di fâ lavôrs cu la curint!

Se no i capite come al nono **de cjançon dai Laipnessless!**»

«Il nono di cui?», i domandà Lussian par sviâ il discors.

«Che al lassi stâ, va! Lui al à di stâmi atent, nol è mica un zugatul! Prin o dopo a scuvierzarin ce che al cumbine, cu la curint, che lis frecuencis dal so cûr a son piês dai sgrasaiots in AM! Bon... cumò lu ai metût a puest. Che al torni cjase ben plancuç e mi racomandi...»

Lussian, tant che un frutat che le à fate francje, al scjampà vie, pensant za a cemût che al veve di finî di comedâ il gnûf toc de sô colezion, cumbinât di une cantine svuedade. Seont lui, a netâlu ben e a cjatâ il transistor just, cundut che al veve cuasi la sô etât, al sarès rivât adore a fâlu cjantâ inmò une volte.

E nol sarès stât sigure un cardiac a meti fin a la sô passion par i *aradios* di une volte.

Da rest, cence une tiradute ogni tant, ce vite saressie?

**di Rafaël Serafin**

*Note: nissun Lussian al è stât ofindût par scrivi cheste conte*